

宋

元

學

案

二江諸儒學案表

宇文紹節——程公說

程公頥

程公許

陳槩

附兄栗

楊知章——子子謨

李修己——子義山——彭泮

張仕佺

范仲黼——蘇在鎔

張鈞

師遇

范子長

高載

范子該

魏了翁

別爲鶴山學案

范氏所傳

范大治

范氏續傳

范蓀

宋德之

高崇

別見鶴山學案

並南軒門人
五峯劉氏王
氏紫巖再傳
鶴山和靖

氏武夷得全

三傳

二程元城子

文四傳

旗剛簡

從子

煇

別見鶴山學案

曾孫

汲

別見草廬學案

程遇孫

附兄王孫

薛紱

鄧諫從

張方

並南軒私淑

黃裳

楊泰之

平甫講友

父虞仲

宋元學案卷七十二

鄞縣全祖望補本

後學慈谿馮雲濠校刊

鄞縣王梓材重校

道州何紹基重刊

二江諸儒學案

祖望謹案宣公居長沙之二水而蜀中反疏然自宇文挺

臣范文叔陳平甫傳之入蜀二江之講舍不下長沙黃兼

山楊浩齋程滄州砥柱岷峨蜀學之盛終出于宣公之緒

述二江諸儒學案

梓材案蜀中之爲張學者謂山盡入是卷其有本非蜀人而相與講學蜀中者

亦附焉

南軒門人

撰對再傳

忠惠宇文願齋先生紹節

宇文紹節字挺臣成都人祖虛中簽書樞密院事父師瓌顯謨閣待制父子皆以使北死無子孝宗愍之命先生以族子爲之後補官仕州縣既第進士累遷寶謨閣待制知廬州時韓侂胄方議用兵先生至郡議修築古城創造砦柵專爲固圉計淮西運判鄧友龍譖于侂胄謂先生但爲城守徒耗財力無益于事侂胄以書讓之先生復書謂公有復讎之志而無復讎之畧有開邊之害而無開邊之利侂胄得書不樂乃以李爽代之召爲兵部侍郎兼中書舍人直學士院以寶文閣待制知鎮江府吳曦據蜀趣先生赴闕任以西討之事先先生至謂大臣曰今進攻則瞿唐一關彼必固守若駐軍荆南徒損威望聞隨軍轉運安

丙者素懷忠義若授以密旨必能討賊成功大臣用其言遣丙所親以帛書達上意丙卒誅職權兵部尙書未幾除華文閣學士湖北京西宣撫使知江陵府統制官高悅在戍所肆爲殺掠遠近苦之先生召寅帳前收其部曲俄有訴悅縱所部爲寇者先生杖殺之兵民皆歡陞寶文閣學士試吏部尙書尋除端明殿學士簽書樞密院事安丙宣撫四川或言丙有異志語聞廷臣欲易丙先生曰方誅曦初安丙一搖足全蜀非國家有顧不以此時爲利今乃有他邪吾願以百口保丙丙卒不易朝廷于蜀事多所咨訪先生審而後言皆周悉事情嘉定六年正月甲午卒訃聞上嗟悼爲改日朝享進資政殿學士致仕又贈七官爲少師非常典也諡曰忠惠

參史傳

進士陳平甫先生槩

附見槩

陳槩字平甫普城人也乾道進士對策慷慨魏良齋讀而奇之告以君鄉有張敬夫者醇儒也先生遂以書問學與兄栗同刻志于聖賢之道予讀南軒集答平甫書及所作潔白堂記蓋友朋之列其時蜀士除宇文樞密外尙未有從南軒遊者平甫請益最先自是范文叔范季才始負笈從之則皆平甫倡導之功也而宋史竟以平甫爲南軒門人或者請益旣久遂執弟子之禮乎平甫之官爵無從攷見而兼山黃氏之源流實由此出淳熙嘉定而後蜀士宵纒燈雨聚筮以從事于南軒之書湖湘間反不如也然則平甫之功大矣平甫嘗言于南軒欲自漢唐以來諸儒之嘉言懿行萃爲一編以明道統又欲訪周程張子之

後人而周卹之惜其著述之無所傳也

修

楊雲山先生知章

楊知章潼川人號雲山老人累舉不仕而得張宣公之學于廣漢歸而喜以授其子曰欲造聖門當從此入造深養熟內外合一治己治人之道備于此矣

知州李先生修己

李修己字思永豐城人也乾道進士參與國軍事陸復齋爲教授盡告以躬行之說謂當息其己學求所未學遂知聖賢源流已而得見朱子學益進先生故與彭止堂爲同年相善因介紹之從南軒遊兩令寧鄉衡陽皆有聲當路多薦之將召以哭趙忠定公忤宰相通判成都府二江范月舟者南軒高弟也方聚

宋史五十一卷七十一
三
同志講學先生與上下其議論時蜀中後進盛從事于南軒之
教而先生與延平張仕侗子真參焉尋知成州韓侂胄聞其名
使人諷其附己先生笑而不答竟不得召先生居官一介不取
而友愛任卹不計有無故歿無私蓄有李成州集十卷子義山
通判張先生仕侗

張仕侗字子真延平人南軒高弟

雲濠謹案朱子爲先生父左司維墓志云公字振綱一字
仲欽劔浦人紹興八年進士官至左司郎中屢與權幸忤
致仕卒子士侗通判融州從張敬夫官學有問驗其操執
器能信其有似公者據此則先生之學問淵源可攷矣

知州范月舟先生仲黼

范仲黼字文叔成都人正獻公祖禹之後也仕至通直郎爲國
子博士兼皇姪許國公府教授初南軒雖蜀產而居湖州其學

未甚通于蜀先生始從南軒學杜門十年不汲汲于進取鶴山謂其剖析精微羅絡隱遁直接五峯之傳晦翁東萊皆推敬之後以著作郎知彭州學者稱爲月舟先生晚年講學二江之上南軒之教遂大行于蜀中其時二江有九先生之目謂范蓀范子長范子該與先生皆成都人薛紱鄧諫從皆漢嘉人虞剛簡程遇孫仁壽人宋德之唐安人或亦有未及事南軒者皆從先生私淑得之而南昌李修己延平張仕佺亦同講習其閒

修

梓材謹案此傳與陳先生平甫傳梨洲原本在南軒學案自謝山修改以入是卷

知州范雙流先生子長

范先生子該

合傳

范子長字少成都人也二江先生從子與其弟子該字少約

同遊南軒之門以進士官太學有要人慕而候之先生避焉鶴山魏文靖公嘗序其事所云閉干木之門或謂迫斯可見卻陽貨之餽乃復拜以其亡是也嘉泰末北闕門鴟尾及省部相次災先是赤青爲沴太陰犯權星天子避殿求言先生與李仲衍趙全道魏鶴山皆上疏極陳韓侂胄之惡以爲爵及輿隸權移主上請退之侂胄大怒諸公相繼罷官吳曦告變上頗思諸正人言有詔召蜀中三人時侂胄尙未死先生與鶴山皆謝不赴惟李季允至已而更化又召蜀中三人先生亦與鶴山豫焉史彌遠忌之先生至京不得入對以吏部郎知瀘州瀘爲夷境酋長楊祭請開白錦堡爲錦州前帥許奕持之未得寢而奕去先生力言其不可乃置平泉寨以鎮之夷人不敢妄動瀘以大治

然卒不得入朝以殿撰知崇寧鶴山之初志學也由先生兄弟及薛符溪以得門戶及入中原始友李敬子輔潛庵今語學派者莫知淵源所自出而蜀中之爲南軒高弟者皆泯然無傳文獻不足可勝嘆哉少約與陳同甫善

知州范華陽先生蓀

范蓀字季才成都人也乾淳以後南軒之學盛于蜀中范文叔爲之魁而范少才少約與先生並稱嫡傳時人謂之四范仁壽虞提刑剛簡嘗請先生講學滄江書院鶴山魏文靖公初爲考索記問之學先生以斂華就實語之故鶴山之稱先生有曰學本誠一論不違條自浩氣養心以求道腴不如剛吐柔而求聲利了翁敢不勉希前輩益勵後圖或可代諸老先生之對庶不

貽吾黨小子之羞者也太府李蔡薦士于朝曰黃公裳李公舜臣與先生由太府寺簿晉大理寺丞累官宗正寺丞知邛州

知州宋彭山先生德之

宋德之字正仲唐安人也慶元二年外省第一爲山南道掌書記召除國子正遷武學博士與諸生論八陳本乎八卦皆動物也奇正之變往來而不窮知此然後可以致勝遷樞密院編修嘉泰末平原已有開邊之說而外人未之知也會赤霄見太陰犯權星未浹旬而北門鷓尾災延及省部天子下詔求言于士多指平原之橫以及時政諸弊而已先生謂離爲火爲日爲甲冑坎爲水爲月爲盜爲隱伏故火失其性赤氣見濫炎起則憂在戎兵之事水失其性太陰失度犯權則憂在隱伏之盜因陳

七事且曰人火小變不足慮天象變臣竊危之是歲沿邊帥守始盡用武臣吳曦既久在蜀皇甫斌在襄陽郭倪李爽在兩淮先生又進言敵未動而輕變祖宗之舊制命武臣帥邊以自貽患晉叛將唐藩鎮之禍將起又言蜀帥權重宜及今防微侂胄惡之先生請外有留之者遷太常丞次年出知閩州吳曦變作託傷足以避事議誅始赴閩而楊后用事侂胄殛邊事大壞無不如先生之言者擢本路提刑安沂公丙素有不快于先生以不俟代者至輒用觀察使印洩事劾先生傲視君命詔降一官歷湖南湖北提刑入爲兵部郎時中朝頗疑沂公史彌遠以問先生對曰蜀無安丙朝廷已無蜀夫人有大功不敢以私嫌毀之執政不悅未幾罷官沂公嘆曰嗟乎丙不知正仲正仲知丙

丙負正仲正仲不負丙乃遣人請昏先生謝之論者益服其公
已而起知眉州卒先生學于南軒之門少與范文叔輩講道故
其風節凜然而所養極粹惜乎未竟其用云

南軒私淑

提刑虞滄江先生剛簡

虞剛簡字仲易一字子韶仁壽人忠肅公允文孫也爲趙文定
公雄壻文定子昱志士也好讀周程張邵呂謝楊尹之書先生
因知學統所在潛心體認以郊恩任官再舉禮部歷仕知華陽
縣二江范教授仲黼者南軒先生高弟也方會文講學以明湖
湘之緒先生因是得和齊斟酌盡聞胡文定公父子以至南軒
所討論于嶽麓者而致精焉喟然嘆曰洙泗之學堯舜以來之

學也伊洛之學洙泗之學也而乃以爲一家之言乎凡再知丞
康軍招諸生講學境爲大治以安撫使黃疇若薦召赴都堂不
果奉祠未幾起用未上遭劾罷嘉定十一年詔知簡州金人犯
邊制置使董居誼辟爲參議官先生經濟之畧得之家傳至是
固辭不行或曰將王事何先生黽勉從之請收人才厚軍犒以
結士心抽還忠義人之配內郡者以紓邊人之憤又請緩科三
路饑夫之直皆得施行大散關陷東路帥李貴遜去天水一帶
皆被兵西路帥莫宵行先生慨然請往次魚關遂自移金平督
帥前進人心恟恟先生謂曰我師旣出敵必不能越大安已而
大安果以勦敵聞會居誼召還先生亦抵簡利州潰卒作亂由
果聞以趨簡大書其幟曰破簡入西川時先生至任甫五日驚

奔相屬關學劉文節公方家居貽書相約效死先生阻江固守賊知有備去之而張威歸軍過城下賑其匱乏軍士大喜劉文節上言剛簡保守一城遮蔽西川遂有夔州提刑之命兼提舉常平俄改利州先生召軍帥劉昌祖謀曰必復阜郊湫池然後敵氣可奪雖圖秦鞏可也昌祖曰諾遣人焚湫池之糧遂復之先生曰未也時樞府慮生事每以越境爲戒昌祖猶豫不敢行先生督之如南谷遣其親將進屯阜郊于是階鳳成和之民皆荷戈赴之得兵三十萬軍聲動天地內薄乘障斃其大將郭贊敵之壻也先生得阜郊之捷正欲擣秦州有以密劄勒昌祖還者忠義人大憤散而爲盜阜郊復受兵先生夜出撫定士民復募軍擣鞏之青野原以牽制之敵師始退于是先生請集保甲

之民以爲守禦三年之間圍集三十九萬二千餘人自是閭閻
有備又請修屯田之利而墾田百餘萬遺儲以足魏文靖公除
工部侍郎舉以自代不報先生與制置使鄭損不相得損小人
也先生乃上歸休之請五上報可旣歸而損竟誣劾先生罷祠
先生罷之三年而損棄階成五州先生猶貽書請司力言不可
其始終憂國如此是年卒所著有易傳論語解詩說尤致精者
易本邵子之學參以周程諸書及漢上朱氏說論著十有六年
不以示人卜居成都之合江范季才梓材蔡棠當作森即華陽
別傳云滄江先生
真剛簡亦師事之亦南軒高弟也爲題曰滄江書院學者稱爲
滄江先生長沙吳制使德夫曰湖中親炙胡張者多而得其學
如此者鮮矣魏文靖公稱其學以爲由博致約浩然獨得云先

生以故相之孫著效危疆顧未嘗得登朝一展其抱負君子于是知宋之終于不競也先生論學之大旨曰乾之九二龍德而正中庸言之信庸行之謹閑邪存其誠而坤之六二言敬以直內然則中庸誠敬是乃天地自然之則古今至實之理帝王所以扶世之極聖賢所以明德新民未有不由之者楊伯昌聞之嘆服張亨泉先生方亦同學易于滄江

潛使程先生遇孫

附兄王孫

程遇孫字叔達仁壽人也累官太常寺丞潼川潛使少年雄于文已而折節爲南軒之學范文叔居二江所謂九先生者先生其一也先生有兄王孫官至雅州簽判亦躬行君子與先生最友愛及卒于官貽書以玉環爲訣先生每見玉環則嗚咽流涕

其至性如此

祕書薛符谿先生校

通判鄧先生謙從

合傳

薛敏字仲章龍游人也于書無所不讀嘗見朱子所注楚詞于黃棘之柱策以爲策杖黃蘆荆棘之間笑曰楚王初盟秦于黃棘再盟于武關而被執故原其禍始耳其知黎州州爲羣蠻所居而能興起其民築玉洲書院以講學學者稱爲符谿先生二江講學九子之一也史彌遠既死鶴山魏文靖公嘗以後進禮上之書曰如執事者在今寡傳嘗欲一拜下風因循不果起家爲吏益遠聲華聖學不講士棄其德性之知以情于見聞之陋其酣身利祿者固無足言也稍知自好者亦以纂詞緝句爲學

問之極功俗流世敗真知正救乃至養疴枕席臥制四海舉朝
薦紳之士奔走後先莫以爲非今天去積年之疾是治亂安危
之幾也或爲地節之親政或爲天寶之踵亂皆未可知也而朝
會無白首大儒可備顧問則天下事誠未可知也某欲乞身以
去卒酬讀書之願未知見日臨紙惘然鶴山又題其則堂詩云
卓哉符谿老吾道資禦捍萬殊錯標中獨識一理貫反躬事省
察憤世興寤嘆揚堂闕斯則絕識陋秦漢以進士由成都教授
召爲祕書郎廷對極言韓侂胄之奸坐劾去所著有則書十卷
皆談易理鶴山自以爲不及同時有鄧諫從者字元卿亦漢嘉
人亦豫二江九子之一嘗通判黎州見于周益公集不知其後
官階所至

提刑張亨泉先生方

張方字義立資中人也二江范氏滄江虞氏講明南軒之學先生與焉以慶元進士官簡州教授爲諸生痛陳佛老之妄使不惑于趨向其于時學徇名失實好高忘本之弊尤痛切入膏肓歷知邛州眉州果州遷直祕閣四川制置使參議官充利夔成都路提刑劾去墨吏數人又開新渠以殺三江之怒疏條急務六事皆直陳時政之失又疏言大本大剛大勢大務聞者悚栗改帥漢中以兵復天漢武休虎頭之險蠲錢三十萬糴米二千斛給田以卹死節之家進尙書兵部郎以母老乞歸養用郊恩官其弟鶴山魏文靖公極重之學者稱爲亨泉先生有亨泉稿一百卷子讀鶴山祭先生文則先生以母喪哀毀不起者

平甫講友

忠文黃兼山先生裳

黃裳字文叔普城人少穎異能屬文第進士調閩州新井尉未赴惟外艱邑子從受業先生語以經義又爲之講解其後學益詣悉焚其稿服闋授巴州通江尉三年杜門潛究經傳出入古今默而精思或達旦不寐人與語若無聞然于是剖微析幽宏深四達文譽日甚總領趙公公說聞其名俾諸子從之遊光宗卽位制帥畱公正薦五士公爲之首進對謂中興規模與守城不同因論大利害凡數千言上極異之除大學博士進祕書郎遷嘉王府翊善每勸講必援古證今嘗作八圖以獻曰太極圖曰三才正性曰天文曰地理曰王霸學術曰九流學術曰帝王

紹運而終之以百官文武每日爲學之道當體之于身本之于心總宜以心爲嚴師于心有一毫不安者皆所不可爲也紹熙二年二月雷雪交作先生上封事語特切深擢起居舍人未幾瘡發于背少瘥卽奏人君納諫不可執以己私因私心而生勝心因勝心而生忿心是以臺諫不得其職而去上領之先生見王向學日益因作渾天儀輿地圖勉以進學如天之運行不息居數月除中書舍人尋除給事中進侍講貴近一限以法後值侍臣進用不當繳論甚切遷兵部侍郎先生不受命乞去改除顯謨閣待制仍爲翊善太上見嘉王學問殊進謂先生曰此皆卿力也先生曰臣伎止此朱熹四十年學問陛下宜收召使備寮屬且言蜀士楊輔劉光祖相繼在選可充學官上嘉納焉時

上以憂疑成疾不過重華宮先生苦諫及壽皇不豫復抗聲切諫隨以號泣宮門閉掩涕而出自是先生瘡復作連章請外不報乃移疾關外聞壽皇遺詔亟入臨瘡遂大作寧宗卽位不能朝再除給事中改禮部尙書兼侍講入謝奏曰孔子曰有始有卒者其惟聖人乎詩曰靡不有初鮮克有終所謂有始有卒者由其持心之一也反覆告誡一主此意蓋先生絕筆之作也先生三歲病瘡以國事積憂遂至不起年四十九贈資政殿學士諡忠文先生爲人簡易端純每講讀隨事納忠氣平而辭切事該而理盡與人言傾盡底蘊恥一書不讀一物不知所爲文明白條達有王府講義及兼山集

雲濠案宋志稱兼山集四十卷

論天人之理性

命之源皆足以發明伊洛之旨嘗與其鄉人陳平甫兄弟講學

平甫南軒高弟也師友淵源蓋有自來云

參攬攻媿集

雲濠譚案宋黃先生裳有二一字冕仲南平人元豐五年進士第一累官禮部尚書所著有演山集六十卷

字文門人

胡對三傳

教授程克齋先生公說

程公說字伯剛眉山積學苦志以春秋經傳倣司馬遷書爲年表世譜歷法天文五行地理禮樂征伐官制諸書自周魯而下及諸小國夷狄皆彙次之時有所論發明成一家之學卒年三十七

參直齋書錄解題

謝山程氏春秋分記序曰南軒先生講學湘中蜀人多從之而范文叔宇文正甫最著眉人程克齋兄弟並遊于宇文之門而克齋之學最醇所著春秋分記九十卷左氏始

終三十六卷通例二十卷比事十卷又纂輯諸儒說爲春秋精義未成而卒別有詩古文詞二十卷語錄二卷士訓一卷程氏大宗譜十二卷弗盡傳也獨分記則其弟滄洲閣學上之祕府行于世克齋官邛州教授方爲此書未卒業聞吳曦以蜀叛毀車馬棄衣冠抱經逃歸奉其父入山時其次弟仲遜亦掌教益昌誓不屈賊而克齋悒悒尤甚遂病病中急就其所著幸得成編而卒年尙未四十也

掌教程先生公頌

程公頌字仲遜兄弟三人皆以科第進先生嘗掌教益昌

同上

龍學程滄洲先生公許

程公許字季與一字希穎克齋先生之弟由進士積官至權刑

部尙書生平冲澹寡欲人不得干以私與故相史嵩之不合鄭清之尤忌之所建多格不行其知袁州時新周茂叔祠葺南軒書院聘宿儒胡安之爲諸生講說及婺州召還疏請復京學類申之法以養士氣清之嗾言者劾之出知隆興未拜命而卒贈龍圖閣學士宜奉大夫所著有塵缶集雲濠柴四庫書目滄洲塵缶編十四卷內外制奏議奉常擬諡掖垣繳奏金革講義進故事行世參史傳

楊氏家學

祕閣楊浩齋先生子謨

楊子謨字伯昌潼川人也其父雲山老人得張宣公之學以授先生先生朝夕究圖疑然一室往往踰月不出戶自是默識聖賢下學上達之序動靜語默不違乎誠淳熙七年省試胡文靖

公晉臣得其文以爲有格君氣象列優等人對孝宗發策問之
曰帝王躬行之學莫大于學學者政事之本也欲極乎學之用
不可不求其要何謂要行之以至誠要之以不息是也大學之
道自正心誠意以至乎平天下中庸之道自尊賢以至于來遠
人皆不外乎至誠之一言臣不知陛下之躬行誠與未與試以
天人之應而卜陛下之誠而知容有未至也又曰臣聞之道路
謂陛下左右近習之人雖無顯然害治之迹而諂欺矯實繁
有徒故凡速于求售者幸造宦寺之門珠玉錦繡以充苞苴絡
繹于道而陛下有所不知此非細患也孝宗嘉其直擢置甲科
第八累官通判成都府吏部侍郎李壁舉以自代權發遣黎州
適有吳曦之亂誓以死守移書方請討賊願以義勇爲前驅無

應之者而曦所遣逆黨至成都分遣其將至黎先生以計遣之使又至先生與之文移遷延以待其變而曦已誅以薦召入對首論權臣誤國叛將干紀願鑒過往之已事開維新之令圖其二論皇太子既正儲宮之統宜使親正人授正學王者之學果何學也大學之所謂正心中庸之所謂謹獨是也惟輔導得人而後有所受其三乞招填黎州土軍分番上寨給緡糶粟以備緩急除吏部郎因轉對請于淮上荆襄闕表漢中空閒之地招募軍民雜耕以省運餉節濫賜捐內帑以充糶緡以收未楛嚴責州郡實常平之儲歸廣惠倉以備凶歉罷軍興一切科斂之法復師旅饑荒之地以紓民力又曰民之困苦極矣易失者人心難謐者天意修人事以符天意其要在養民除軍器監復兼

侍左郎官上言學術國家之壽脈公論天下之元氣所以扶持
皇極主張國是者必歸諸此更化以來眾正之路方啟而羣枉
之門漸開善類雖進而忠鯁之士有相繼引去者矣姦黨雖斥
而夤緣勢要有拂拭敘用者矣君子小人猶薰蕕不可同器今
顧欲調停參用之幾何不爲國家之禍寧宗蹙額領首者久之
而小人側目矣先生知不容請補外除大理少卿有坐僞告者
事連中官先生移文內省索賊小人忿恨除直華文閣提刑成
都再兼知嘉定府皆有善政尋請老進直徽猷閣奉祠起知隆
州不赴臥家十年召赴行在屯田郎度正貽書強起之力辭詔
晉祕閣修撰致仕先生自奉祠講學于雲山書院與諸生敷陳
論孟學庸大義平生不輕著述欲使人精體實踐以造于得其

遺文有浩齋退稿四十卷

李氏家學

中正李後林先生義山

李義山字伯高豐城人知成州修己之子嘉定十三年進士授
大宗正兼金部輪對言爲善不可有疑心去惡不可有悔心并
陳進善不能無疑者三去惡不能無悔者三由是罷出知吉州
後以湖南提舉攝帥漕楚俗尙鬼有妖覲譚法祖假禍福惑人
先生曰此張角孫恩之漸也斬法祖燬其祠歷階至中正大夫
所著有後林遺藁思過錄

參江西通志

梓材謹案萬姓通譜以先生爲嘉魚人且言其師事朱仲
晦張敬夫儒林宗派因之以列于朱張之門黎洲學案原
本亦存其名于南軒門人攷先生爲嘉定庚辰進士魏鶴
山誌其母蔣恭人墓言先生逾冠擢乙科當生于慶元間

而朱子即卒于慶元庚申南軒先生卒于淳熙庚子其不及事朱張明矣故爲易著于南軒再傳云

月舟門人

常幹蘇先生在錄

蘇在鎔字和父邠人受學范文叔之門淹貫諸書晚而斂華就實以主敬教學者其精神氣貌能使惰者肅譁者默毋敢慢焉以進士官魏城縣丞縣民仇其長官鼓眾入城將爲亂先生聞變挺身出諭之民爲散去長官得免死顧反以是忌之先生即引去其後爲潼川常平司幹以白冤獄忤上官遂請致仕剛決不撓不媿其師友之教者也退居七年益講學臨終以五峯遺書授其子曰此吾從范先生得之手自讎校汝可細觀當自得之題詩而逝

補

提刑張先生鈞

張鈞字子和江源人也少厲名行一時鉅人元夫率從請益孫巖老松壽蜀名儒也尤器之受業范文叔之門光宗初政以布衣上書論國家大恥列聖深仇踰六十年而未復其言沈痛又言古有四禍中宮外戚閹寺朋黨而夷狄不與焉紹熙四年大對首言舉朝克己而後可以論一人進德之機未謂皇子萬世攸繫豈可以世俗學者之事責之有司第爲舉首尋置乙科主西鄉簿調爲隆州教授已而知什邡縣大書堂上日奉公如上帝克己如勅敵愛民如赤子防吏如餒狼境內稱治通判瀘州吳曦之亂守川陸以待王師開禧三年以李參政雁湖薦召對先生奏曰陛下初卽位劉光祖嘗以五箴進讀至思箴陛下作

而曰當從原頭上理會大哉王言天下國家之大本也乃陛下
所謂原者皆爲一權臣所湮而使天地人之憤塞乎天地之內
抑鬱不得申以兆其變因祀隱喪而禮樂之原湮以臣掩君而
忠孝之原湮設賢進姦而威福之原湮廢經反常而學術之原
湮相恐以權相招以利而命義之原湮主竊于前僕貨于後而
爵賞之原湮湮法度之原而本朝美意盡廢湮廉恥之原而人
才良心盡壞陛下卽其所湮者以爲規模之要其序有六一者
體乾而總萬化之目二者法祖以還舊制之良三者用禮樂之
實以破曩日之餘氛四者修仁義之實以淪曩日之乖氣五者
抹活生靈以補權臣之招戮六者振厲士夫以補權臣之斲喪
則原之湮者徹何物驕敵能勝陛下澄源進德之功哉其二曰

今日之最急者莫如活百姓蜀中自紹興末年以來一塵不警百姓歲輸贍軍近二千萬緡泊權臣忽開邊于大饑之後用度繁興內郡廩庾取之無錙粒之積調夫繁夥倍于常賦激賞畸零旣減又復陛下赤子或死于餒或死于兵可謂已極若非陛下以愛肌膚之心愛百姓以畏夷狄之心畏百姓使此念充塞彌滿以起天地悔禍之心則國家豈不岌岌然今亦不通取之天取之人取之地以爲吾用而已取之天者欲使實德散爲雨露兩陽結爲百穀取之人者當散權臣之家貲以拯百姓之窮困取之地者欲舉鄭剛中營田之法爲蜀民除對糴之害推之荆襄以及南淮無不可行其三曰天地之間惟忠義二字以之經天文使三光不失其序以之緯地理使岳瀆不失其宗以之

立人極使彝倫不失其道惟陛下力行君師之職于一身以起忠孝之心于天下苟欲更化莫此爲切不然何以謂之化也除太常寺簿遷國子監丞以旱求直言上書謂陛下當求之一己不可求之天地因條更化之說一更弊之說六遷太常丞嘉定三年輪對言仰視俯察以見天心未復近采遠取而見民情不寧派大計所自而貨源欲窮聽四方動息而寇憂難置皆人所難受者除祕書丞兼兵部郎以君臣父子夫婦之大倫爲上精言之然皆不能用也先生乃請外除潼川提刑力行常平以甦民困已而罷爲運判尋奉祠卒

孝子師先生遇

師遇字厚卿成都人也二江先生范文叔之壻有篤行紹定元

年被貢以母疾不就嘗禱于上下神祇曰苟造物許一齒名于
進士籍則馳祿吾母俾壽且寧不願仕也已而母卒踰三年成
進士以前誓不欲仕親黨強之乃受官歸而得疾嘆曰是蓋食
言以干天怒也遂致仕生平守南軒之教至爲醇固

雙流門人

縣令高先生載

別見鶴山學案

范氏所傳

文靖魏鶴山先生了翁

別見鶴山學案

宋氏門人

知州高先生崇

別見鶴山學案

虞氏家學

虞先生統

別見鶴山學案

黃氏門人

大理楊克齋先生奏之

父虞仲

楊泰之字叔正青神人也祕閣修撰虞仲子世有家學少受業于黃兼山藏書數萬卷手自警校卧不設榻者幾十年以躬行自矢舉世聲利無足動心初以郊恩補官已而奏名類省試吳曦叛先生方攝成都教授安撫使楊輔集議先生昌言今日之事當計順逆不當計禍福正名討罪曷爲不克不然願與閣下死此以報國輔不能用先生致其事而去曦誅其事上聞詔起爲羅江丞吳獵諫蜀先生上書曰吳曦爲亂而士大夫不從必不敢發旣亂而有抗之者必猶有所憚夫亂者曦之爲也亂所

以成則士大夫之爲也于是安丙薦諸朝曰蜀中名儒楊虞仲之子當逆臣之變勉有位者無動言不用拂衣而去使得尺寸之柄必能見危致命詔赴都掌以親老辭特授知廣安軍丁艱免喪知富順監三日卽告寮吏士民其勤攻吾之闕發廩粟以濟民知普州蠲賦二萬減省浮用以輸邊又二萬賑貧半之安丙再薦之召赴行在而先生固辭知果州減浮費以蘇民困如普州時一切禮饋貯之庫以賑貧寶慶二年再召入對首請法天行健奮發英斷總攬威權無牽于私意奪于邪說以排蠱敝次謂本朝德澤邇來斲喪無餘民無常心何恃爲國次論陛下以直言求人而以直言罪之言路益梗士氣益消上奇之除工部郎中時眞魏諸公方相次去國人方縮舌而先生自遠方來

首及之言事者稍吐氣已而又輪對言三十年間士大夫之說有三爲安靜爲用中爲更化安靜則苟偷也用中則模稜也更化則紕政尙多何更之有又謂兵端作于開禧之初民力未困故常心未失今民力已窮常心喪矣識者以爲篤論遷軍器監入對謂去歲風雨爲暴水潦潰溢此陰盛陽微之徵而臺臣諉曰雷川水患之慘桀之餘烈也嗚呼尙忍言哉又言疫氣僨作盜賊肆行淮楚之間狐狸跳梁徵狀日異不可謂細故也願進君子退小人一掃賄賂貪墨之習而爲禮義廉恥之歸上首肯之除大理少卿先生遂申前說謂巴陵追降之命重于違羣臣而輕于絕友愛不思天倫之至痛乃曰不當立後以貽他日憂何示人之不廣乎又曰今日不言後必有言之者與其追恤于

後固不若舉行于今也。初先生三被召再申命四辭不得。乃至甫三月卽求歸未得。是日詔以直寶謨閣知重慶府先生遺書宰相謂呂夷簡末年孫沔上書謂天下將有土崩瓦解之勢是張禹不獨生于漢李林甫且復見于今。又引其先相國越王事勉之。聞者爲之變色。先生嘗以宰相生辰壽之詩有云潭潭仗台鼎旣閱二十年治效何悠悠民瘼殊未痊近甸饑餒接三垂烽火連人意苦不紓生理絕可憐先生之得罪于權相者非一而獨免于禍則亦幸也。其治重慶豈弟如普果二州時期年乞歸先生時已病道卒。所著有克齋集百卷大易要言二十卷論語解三十卷老子解二卷雜著五卷類集經史百餘卷南軒私淑之傳以先生爲第一。宋史列之儒林而不知其源流所自且

于其大節亦尙未詳爲可惜也

伯高門人

胡劉四傳

彭先生泮

彭泮清江人忠肅孫李義山卽忠肅長子欽壻而先生又爲義山壻

范氏續傳

縣丞范先生大治

范大治者成都人也幼時常及從學滄江書塾官崇仁丞宋亡不仕與學者語舉書傳常連卷數千百言不遺一字天文地理律應姓氏職官一問輒數千百言不止虞集猶及見之當是華陽之後人也

虞氏續傳

編修虞井齋先生汲

別見首盧學案

宋元學案卷七十二終

麗澤諸儒學案表

葉邦

子榮發

孫霖

曾孫審言

徐僑

別見滄洲諸儒學案

樓昉

李壁

李璽

並見滄洲諸儒學案

王摛

子應麟

別為深寧學案

子應鳳

別見深寧學案

鄭清之

趙范

趙葵

並見滄洲諸儒學案

應懌

附弟倬

樓昞

葛洪

喬行簡

李誠之

王介

喬夢符

王瀚

王洽

石範

朱質

葉秀發

子 埜 別見西山真氏學案

子 柏 別為北山四先生學案

潘景憲

潘景愈

潘景夔

潘景尹

郝補之

杜旂

戚如琬

孫紹

曾孫

象祖

元孫

崇儉

附師王元章別見北山

四先生學業

戚如圭

戚如玉

夏明誠

鄭宗強

汪淳

汪大度

汪大章

汪大亨

汪大明

黃渙

父敦義

黃謙

陳黼

孫開之 別見北山四先生學案

詹儀之

邢世材

郭澄

胡子廉

康文虎

康文豹

趙善談

趙彥柁

羊永德

李大同

時澗

子哲

子少章

時澣

郭頤

羣豐

羣嶸

羣峴

周介

彭仲剛

盧汝琰

盧汝瑄

樓孟愷

樓仲愷

樓叔愷

樓季愷

汪仲儀

郭粹中

父口

郭敏中

郭允中

郭時中

葉誕

徐文虎

父時父

陳錫

徐侃

徐倬

王深源

鄭聞

別見北溪學業

並東萊門人

白水玉山三

山芮氏再傳

元城龜山

氏武夷紫微

橫浦三傳

陳水二程榮

陽了翁廬山

和靖四傳

宋元學案卷七十三

餘姚黃宗羲原本

後學慈谿馮雲濠校刊

男百家纂輯

鄞縣王梓材重校

鄞縣全祖望補定

道州何紹基重刊

麗澤諸儒學案

祖望謹案明招學者自成公下世忠公繼之由是遞傳不替其與嶽麓之澤並稱克世長沙之陷嶽麓諸生荷戈登陴死者十九惜乎姓名多無攷而明招諸生歷元至明未絕四百年文獻之所寄也述麗澤諸儒學案

梓材案東萊學派二支最

盛一自徐文清再傳而至黃文獻王忠文一自王文憲再傳而至柳文肅宋文憲皆兼朱學爲有明開一代學緒之盛故謝山云四百年文獻之所寄云

東萊門人

林汪再傳

主簿葉先生邦

葉邦字子應金華人大冶主簿受業呂成公之門以所得于成公者授徐文清公僑文清後爲朱文公門人高弟而于先生執弟子禮沒身不衰

參黃文獻集

雲濠謹案文獻集未舉先生之字其字子應見吳正傳所題徐文清手書雜彙後且稱爲鄉先生云

軍守樓迂齋先生昉

樓先生昉

合傳

樓昉字陽叔號迂齋鄞縣人與弟昞俱以文名

雲濠案先生弟字季文

從

東萊于葵嘗以其學教授鄉里從遊者數百人李悅齋學士王厚齋尙書其高弟也後守興化軍卒

梓材謹案李悅齋爲紹熙庚戌進士厚齋尙書以嘉定癸未生相去三十四年且其父溫州已是幼從迂齋尙書未必再及樓門王厚齋云云當是王厚齋尙書之父之譌脫耳

端獻葛先生洪

葛洪字容父東陽人從呂成公學登進士第歷官爲尙書員外郎上書言今之將帥非必奮不顧死冒水火蹈白刃而後謂之忠也第職思其憂謂之忠公爾忘私謂之忠純實不欺謂之忠乞嚴飭將帥申儆軍實累遷參知政事封東陽郡公援王素諫仁宗卻王德用進文事以止備嬪御世多稱之卒諡端獻杜清獻範稱其侃侃有大臣風有奏議雜著二十四卷

文惠喬孔山先生行簡

喬行簡字壽朋東陽人學于呂成公之門登紹熙進士歷宗正

少卿祕書監權工部侍郎兼國子司業兼史院兼侍講理宗卽位貽書丞相請法孝宗行三年喪應詔上書曰求賢求言二詔之頒果能確守初意則人才振而治本立國威張而姦宄銷臣竊觀近事似或不然其所召者非久無宦情決不肯來之人則年已衰暮決不可來之人耳彼風節素著廉介有守者論薦雖多固未嘗收拾而召之也端平二年朝議收復三京又上疏曰臣不憂出師之無功而憂事力之不可繼有功而至于不可繼則其憂深矣自古英君必先治內而後治外陛下視今日內治其已舉乎其未舉乎不聽師果敗績進知樞密院事後加少師保寧軍節度使醴泉觀使封魯國公卒于家年八十六諡文惠先生歷練老成識量宏遠居官無所不言好薦士多至顯達至

于舉錢時吳如愚又皆當時隱逸之賢者所著有周禮總說孔
山文集

正節李先生誠之

李誠之字茂欽東陽人受學于東萊釋褐爲饒州教授歷知蘄
州金人犯淮南黃州不保力戰死之先生嘗謂真西山曰篤信
好學守死善道吾輩八字箴也至是果不負所學贈朝散大夫
祕閣修撰封正節侯

謝山答諸生問思復堂集帖曰西河謂宋儒講學者無一
死節夫宋儒死節多矣蘄州死事李誠之最在理度二朝
忠臣之先東萊之高弟也歐陽巽齋爲朱門世嫡其弟子
爲文山徐徑畝爲陸氏世嫡其弟子爲疊山二公爲宋之

大忠其生平未嘗有語錄行世故莫知其爲朱陸之私淑者文山尤不羈畱情聲色而孰知其遠有源流也是豈空疏之徒所得語此况朱子後人有浚南軒後人有唐而趙夏淳者雙峯之高弟也許月卿者鶴山之高弟也其餘如唐震呂大圭之徒不勝屈指而曰無一死節是夢中囁語也潭州之陷嶽麓三舍諸生荷戈登陴死者尤多史臣不能博訪附之李芾傳後今乃反見誘巖于妄人可爲軒渠忠簡王渾尺先生介

王介字元石金華人從朱文公與呂成公遊紹熙元年廷對陳時弊光宗嘉其直擢居第三人歷國子錄上久不朝重華宮先生上疏極諫孝宗崩又力請過宮執喪言甚激切人歎其忠寧

宗立以忤韓侂胄坐劾奉祠久之累遷國子祭酒會旱詔求直言先生手疏論時政又言漢法天地降災策免丞相乞命史彌遠終喪後以集英殿修撰知襄陽府京西安撫使以疾奉祠卒諡忠簡子塾從真西山遊

梓材謹業姑蘇志載先生爲郡人徙起居舍人出知嘉興府又尹臨安改知慶元府卒年五十六又言先生初學于呂東萊徙居金華娶鄭僑女僑實婿汪玉山應辰故其間學有源委蓋本真西山所作墓誌西山又言先生子塾哀其平生所爲詩文奏議外制春秋臆說通鑑解標爲渾尺集蓋先生嘗自號渾尺居士取后山詩雖有千丈清不如一尺渾意也

御史喬先生夢符

喬夢符字世用東陽人嘗從東萊學淳熙二年進士知歙縣有大達當水衝居民歲苦霖先生爲築堤鑿渠人免水患號喬公

街後除大理正奉旨鞠郭倬獄于宿州不畏權勢進監察御史
參金華先民傳

朝奉王定菴先生翰

王瀚字伯海金華人龜山弟子師愈之子而文憲公柏之父也

師呂成公亦逮事朱文公仕至朝奉郎主管建昌軍僊都觀

可言集考

梓材謹案先生號定菴金仁山題魯齋文集日後云僊都
公早從麗澤又以通家子登滄洲之門朱子別集樓賢廡
崖題名有門人丁克王翰王翰蓋即先生翰翰古今字爾

縣令王先生洽

王洽字伯禮金華人侍講師愈之子天資粹雅操行潔修嘗知
當塗縣真西山薦狀言其爲邑也心乎愛人用刑督賦常有不

得已之意士民稱誦翕然一詞云

參真西山集

粹材謹案宋史道學王柏傳父瀚兄弟皆及朱呂之門是先生爲東萊弟子之證

通判石先生範

石範字宗卿浦江人從東萊遊以進士尉奉化歲饑貧民將爲變先生賑之不誅一夫而定遷知婺源縣有月椿錢二萬皆取之民先生請蠲其十之二俄權通判袁州峒獠弄兵袁當其衝先生攝州事練軍旅廣儲蓄博訪守禦之策峒獠不敢近轉通判泉州卒

參浦陽人物記

侍郎朱先生質

朱質字仲文義烏人受學于成公及唐說齋仲友中紹熙進士第二人累官至右正言左司諫兼侍讀權吏部侍郎著有易說

舉要

知軍葉南坡先生秀發

葉秀發字茂叔金華人師事東萊以進士爲慶元府教授著論語講義以訓諸弟子一時鉅儒皆相器重願與之交而楊慈湖簡問難尤詳謂得所啓發後知高郵軍

雲濠謹案宋景濂爲先生傳言其師事呂東萊唐說齋極深性理之學以餘爲文輒擢慶元丙辰進士第弟子慕之從其學者歲至數百人又言其教授慶元時與之交者慈湖而外則樓攻媿史獨善樓迂齋鄭安晚袁絜齋也又言學者尊之曰南坡先生所著有易說周禮說及論語講義等書

梓材謹案宋世葉秀發有二其一仁和人名時字秀發官龍圖閣學士諡文康

教授潘先生景憲

潘景憲字叔度金華人九歲以童子貢京師後入太學益自刻

屬學官汪玉山芮國器王梅溪皆推重焉隆興元年進士請爲南嶽祠官秩滿力請太平教授遠次以歸始爲浮屠說旣而學于東萊先生與東萊同年而齒長聞其論說行身探道之意慨然感悟遂棄所學學焉父喪服除不復仕日遊呂氏之門誦詩讀書旁貫史氏尤盡心于程易朱晦翁子塾其壻也

參朱子文集

太學潘先生景愈

潘景愈字叔昌叔度之弟嘗爲太學解魁年三十餘甚有志趣

東萊稱其有意務實

參東萊遺集

潘先生景夔

潘先生景尹

合傳

潘景夔景尹松陽人其父朝散好謙篤于教子越數百里遣從

東萊遊且謀徙家于婺以便其學

同上

府判鄒先生補之

鄒補之字公衮開化人受業朱呂之門淳熙初舉進士判江寧府著有春秋語孟注兵書解宋朝職畧等書

參浙江通志

薦辟杜橋齋先生旗

杜旗字伯高金華人登成公之門同時陸務觀陳君舉葉正則陳同甫咸稱其文淳熙開禧間兩以制科薦所著有橋齋集

姓譜

知州戚貞白先生如琥

戚如琥字少白金華人從呂東萊遊篤于修齊之道以進士授郴州教授遷國子博士出知台州尋改袁州政績大著甫受代

而卒門人私謚曰貞白先生從兄如圭如玉皆從東萊游

同上

雲濠蓬萊金華府志載先生云其學務以修身齊家見諸實用不爲空言東萊每歎異之

縣尉戚先生如圭

進士戚先生如圭

合傳

戚如圭金華人以進士爲嶧縣尉弟如玉亦遊太學母周氏晚時觀書輒能舉大義嘗讀上蔡語錄顧諸子曰旣不爲祿利復不求人知斯所謂問學者邪其期諸子如此

參東萊遺集

梓材謹案黃文獻志道一山長戚君墓言二先生連起進士乾道淳熙間

推官夏先生明誠

夏明誠字敬仲金華人其學本自呂東萊而自負甚高登慶元丙辰進士第三人一爲安慶推官遂致仕嘗作八詠樓賦序直

斥沈休文爲是樓之辱吳禮部敬卿特稱之

百家記

朝請鄭坦溪先生宗強

鄭宗強字南夫金華人遊于東萊之門講貫理道篤志根源蔡久軒稱其學業精深履行純篤後以朝請大夫致仕著有坦溪集行世

參金華府志

教授汪先生淳

汪淳金華人受業東萊勵志于學授吉州教授講學者咸歸重焉

參浙江通志

汪獨善先生大度

汪約叟先生大章

合傳

汪大度字時法金華人受業于呂東萊慶元初大愚觸權奸貶

韶州先生往送之伴送者凌辱大愚先生以義折之直欲與之坐獄從至貶所久之乃邀經紀其家事甚至晦翁致書深加歎敬弟大章號約叟亦從東萊遊大愚之卒也約叟距秋試纔四日舍之就道護喪以歸 參金華先民傳

梓材謹案時法號獨善吳禮部跋汪元思固窮集云大愚謫鹽陵獨善裂裳裹足送之後徒本高安其弟約叟輟試往護其喪兄弟遂以義聞士大夫王忠文公跋大愚帖則謂時法人稱爲西山先生而僑林宗派又以西山屬之其兄大亨恐誤

梓材又案東萊爲汪灌慶衍墓志云男五大任大亨大度大明大聲大度大明久從子遊據此則約叟大章之子獨善蓋從弟也

汪先生大亨

汪先生大明 合傳

汪大亨字時升汪大明字時晦西山先生大度之兄也皆城公

門人 參王忠文集

州守黃先生渙 父敦義

黃先生謙 合傳

黃渙字德亨光澤人父敦義以六經教子七子皆有成立先生志篤學博嘗從呂東萊遊淳熙戊戌南省第二人後守岳州罷厨傳蠲魚稅毀淫祠卒年八十兄謙字德柄亦遊朱呂之門

著作陳先生黼

陳黼字斯士東陽人少從呂東萊遊永康林大中間其賢妻以女先生未嘗倚爲重也淳熙八年登進士不汲汲進取以恬靜自守林欲召爲樞密院先生力辭嘉定元年大中卒乃遷國子博士著作郎凡三十年偃蹇宦途而不改其樂後丐祠歸貧無

室廬慨居永康以終

參東陽縣志

侍郎詹先生儀之

詹儀之字體仁遂安人也張宣公守嚴州東萊分教先生俱從之遊又嘗從朱文公問學累官吏部侍郎知靜江府已而以蜚語謫袁州光宗登極以其嘗爲宮寮許自便時間中有詹元善者亦朱氏弟子也而以體仁爲名

補

附錄

□□□曰詹體仁慈實肯講學不易得但未免弱蓋膽薄而少決今日善類多有此病每力振之以此思剛明之質誠不易得又曰舊在嚴陵體仁頗惑佛學今卻不然亦得伯恭之力又曰豈第愛民凡事可以商量趨向甚正□□□學

並補

縣丞邢先生世材

邢世材字邦用其先自青州徙汴紹興閒始家會稽先生既舉進士得官盡棄故學徧從長者遊深思力索有所未達憤悱見于辭色退則汲汲求踐其所聞于東萊有連從之講學非一日出爲南康軍司戶參軍遷從政郎金華縣丞未上卒于家年三十七

參東萊遺集

主簿郭先生澄

郭澄字伯清東陽人以父將仕郎夏臣紹興末軍興入貲佐縣官者賜爵視任子補將仕郎調南昌黃巖主簿皆不行先生少時將仕奇其敏悟爲築西園舍芻延名士講授鄉之秀民願請業者悉聚而館焉先生既用力于學益知師友之可親辭氣悃

穎未嘗不以善其身迪其族衣被其鄉間爲主退而驗其語隨

其力之所至皆有以自見云

同上

梓材謹案說齋學案吳主簿傳云郭氏有西園南湖石澗三書院招延呂成公薛象先之徒教授子弟先生爲西園學者是亦呂薛門人也

雲濠謹案葉水心誌先生父將仕墓言其嘗使先生出從大師歸而與其師學又言先生靜而敏所論質皆能記憶所舉發皆能推見所得非一師爲之師者多自以爲不及也又案陳龍川爲郭德鄰哀詞云德鄰之子曰澄伯清者歷從一世士君子遊德鄰先生父字惜先生所得諸師多不可考見云

胡先生子廉

胡子廉者淳安人博極羣籍不屑科舉之學從東萊先生遊終

身不仕

補

康先生文虎

康先生文豹

合傳

康文虎字炳道與弟文豹字蔚道皆東萊弟子

補

梓林謹案謙山奉臨川帖子五引大愚遊候灣山記云康炳道兄弟會于王季和家謝山自注如是

安撫趙先生善談

趙善談東萊門人官安撫

通判趙先生彥秬

趙彥秬字周錫東陽人師事呂東萊擢取應科授右選精春秋左氏傳作發微一百篇以進上嘉之旋借和州觀察使充接待副使隆興元年登進士第換宣義郎終眉州通判

通判羊先生永德

羊永德縉雲人紹興進士官奉議郎徽州通判師事成公著春

秋發微子哲見括蒼彙紀

尙書李先生大同

李大同字從仲東陽人學于成公與朱文公之門登嘉定進士第官至工部尙書以寶謨閣直學士知平江府有羣經講義

朝散時南堂先生澗

時先生澗

合傳

時澗字子澗蘭溪人師呂東萊淳熙辛丑進士累官朝散郎通判台州東萊輯書說自秦誓泝洛誥未畢而卒先生補完之有南堂集若干卷兄澗字子雲亦師東萊著尙書周官餘論未成卒

參企華賢達傳

監簿郭固齋先生頤

郭頤字養正嚴之壽昌人也進士從東萊先生遊官至軍器監
主簿學者稱固齋先生

補

提轄鞏栗齋先生豐

鞏豐字仲至號栗齋其先鄆州須城人渡江爲婺州武義人少
遊成公之門淳熙進士嘗知臨安縣稍遷提轄左藏庫卒葉水
心銘其墓

祖望謹案胡紘以高科求進不得怨忠定鞏栗齋亦以舍
選前列訴京鎧京之對之無異忠定而栗齋極歎鎧言之
是反自引咎毫無怨尤

司封鞏厚齋先生嶠

鞏先生峴

合傳

鞏嶸字仲問

梓材案水心爲仲至墓志云季氏仲同

栗齋弟也淳熙二年進士累

官至太學博士大理寺丞上書言兵端不可開忤宰相出知嚴州陛辭力言外攘當先內修已而直祕閣歷遷司封郎奉祠致仕先生靜正夷博居官未嘗澤辭色貫聲光以媒進而儒術吏治所至皆有聲詳見洪平齋墓志所著有厚齋集八十卷先生之母楊氏通毛詩論語孝經知大義故自長子峴而下皆知師東萊傳正學有聞于時惟峴失其事而不別爲之傳

補

梓材謹案水心文集楊夫人墓表云嫁東平鞏法鞏君死夫人年二十六子長曰豐三歲幼嶸也始生是楊止二子所謂長子峴豈卽栗齋之改名邪然又謂峴失其事何也疑楊夫人爲鞏君繼室長子峴當是前夫人之子故不之數耳

周先生介

周介字叔謹括蒼人也從東萊晦翁遊

補

提舉彭先生仲剛

彭仲剛字子復平陽人也乾淳之際永嘉儒者林立而平陽稍爲別派徐忠文公子宜以心學起其說合于金溪王信州道甫以事功之學起其說合于永康先生徧遊其閒及以進士釋褐主金華簿始聞麗澤之教東萊謂其用力甚銳先生之學不事論說以實踐爲宗旨尤有吏才衢州大水憲司檄下金華令先生往覆視先生請曰衢水高者出屋境殺稼溺人行道共知旣再檢實矣猶往覆視者防吏之欺將使民實得食也然恐待覆視而民已死矣憲司感其言卽出米恣所賑移臨海令均其民之力役圖縣鄉之地幾都幾保合爲一圖而物數其地之所有

有以圖上者先生曰善猶有遺其人曰無先生指曰某地方鎖
有某某居之某地有松林水步今胡失之其人大驚不知先生
何以得之也由是整廢墜甚多先生善聽訟然不自以爲明每
諭之曰雖訟而直所屈多矣民愛信之訟爲衰止提刑薦其政
召付都堂審察授兩浙運司均斛官以近臣薦召爲詳定一司
敕令所刪定官遷國子監丞以試進士與知舉者忤罷官已而
起知全州時陳公君舉詹公元善任漕使首爲減月椿錢十三
四先生又減繁費以甦民力然後敢豫借寬省限商稅止取正
錢帶納者錫其大半輸租得自槩量吏胥不敢取斛面而擇其
耆老之有學者師長其子弟先生于聽政之暇親執經而教
之以外艱歸凡先生所至去後無不思者紹熙五年明越大饑

特令先生爲常平提舉蓋且向用矣是年病卒葉水心日子復之爲學以爲非同聲趨和所能至也故不敢以意之爲是而獨以力之能者試之常左經而右律目驗而耳覈考實以任重先難以致遠非其心之所通雖誠聞之不苟從也非其行之所至雖審知猶憖置之故其材爲實材德爲實德此先生之學之大致也先生不著書頗有水心之文得以見其本末云

補

盧先生汝玖

盧先生汝瑄

合傳

盧汝玖汝瑄淳安人子權大經之叔季子也東萊爲新定校官季子實綴弟子員後其叔介季以見東萊蓋叔季遊居數年

東萊遺集

樓先生孟愷

樓先生仲愷

合傳

樓先生叔愷

合傳

樓先生季愷

合傳

樓孟愷仲愷叔愷季愷義烏人並從東萊遊父蘊卒東萊志其

墓

同上

汪先生仲儀

汪仲儀金華人嘗從東萊遊母卒請銘于東萊

同上

縣尉郭先生粹

父口

主簿郭先生敏中

合傳

鄉貢郭先生允中

合傳

鄉貢郭先生時中

合傳

郭粹中敏中允中時中武夷人朝散大夫戶部員外郎知常州總領湖廣京西財賦某之諸子也東萊與戶部遊再世諸子相從講學粹中嘗爲龍游尉敏中主江山簿允中時中皆應進士舉

同上

縣令葉先生誕

葉誕字必大蘭溪人乾道進士從東萊遊嘗主清江簿其父卒東萊爲之志墓官至吳縣令

同上

徐先生文虎

父時久

徐文虎分水人從東萊遊相與居者數年其父時久趣之從師

友講習甚篤

同上

陳先生錫

陳錫烏傷人嘗執經于東萊

同上

徐先生侃

徐先生倬

合傳

徐侃徐倬義烏人文清公僑之兄也皆學于呂成公而文清師

事朱子

參王忠文集

王先生深源

王深源婺州人東萊之徒也鄭聞在呂氏家塾從先生爲學

參

陳北溪集

梓材謹案東萊學案監嶽祖泰傳語其友王深厚深厚嘗作深原原爲源之本字蓋因原而譌爲厚爾

葉氏家學

林汪三傳

隱君葉先生榮發

教授葉先生霖

合傳

葉榮發金華人其父邽爲徐文清公師先生深自韜晦罕與物接子霖始復以家學授徒端明殿學士王埜知南康軍葉闔咸敬禮焉官終蘭溪儒學教授

州同葉先生審言

葉審言字謹翁金華人蘭溪教授霖之子先生于書無所不讀卓然自立父子相爲師友嘗仕浦江義烏二縣教諭所至以興壞起廢爲務任衢州之明正書院山長復道流冒占之田二百餘畝及爲吉水教授士論翕然主晉江簿同寮有與之不合者力搆陷之使者得其冤狀而莫能直竟去官改婺州路司獄以

年講老詔晉秩同知瑞安州致仕先生學以寡欲爲宗治家有法吉凶諸禮一遵成公家範曰吾有所受之也室廬再厄于火僑寓唐氏說齋精舍久之乃得老屋數椽教子之餘日以種蒔爲事所入不足自給處之晏然卒之日有書數卷田數畝而已許文懿公謙柳待制貫吳禮部師道張修撰樞皆雅重之

葉氏門人

文清徐毅齋先生僑

別見滄洲諸儒學案

樓氏門人

文懿李雁湖先生壁

文肅李悅齋先生塋

並見嶽麓諸儒學案

知州王先生搗

王搗字謙父其先浚儀人徙居于鄞先生博學耿介爲樓迂齋高弟復從史獨善遊文藝深醇善議論壯歲試詞學科不中輒棄去自誓曰他日必令二子業有成後登進士第同年余天錫參知政事屬教其子弟歲終致束脩以謝先生不受拱而言曰二兒習詞學鄉里無完書願從公求尺牘往借周益公傳內翰番陽三洪公暨往昔習詞學者凡二十餘家所藏書余欣然許之後二子果俱中詞科爲安吉丞攝令長興捐俸周水災再攝新城爲貧民完賦遷國子正將作監主簿通判婺州御史劉晉之誣衢州掾慮囚受昧先生得實力白其誣晉之不敢犯晉之蓋史相黨人也後攝郡去日以羨財畱于官改祕書丞守徽州遷吏部郎中兼崇政殿說書疏言羣臣遜志之言多逆耳矯拂

實未之見其議剴切深中時病後直祕閣知溫州淳祐十一年
上書汲古傳忠又書竹林二字賜之明年卒年六十九子應麟
應鳳 參延祐四明志

忠定鄭安晚先生清之

鄭清之字德源

雲濠案先生初名燮
字文叔別號安晚

鄞縣人少從樓迂齋學能

文樓攻媿亟加稱賞登嘉泰進士第調峽州教授帥趙方嚴重
靳許可先生往白事爲置酒命其子范葵出拜掖先生無答拜

且曰他日願以二子相累遷國子學錄理宗卽位累官至參知
政事史衛王卒先生爲右丞相慨然以天下爲己任召還眞西

山等十五人

雲濠案十五人者眞文忠與魏文靖了翁崔清獻
與之李文肅聖徐文清僑趙尙書汝談九尙書

游觀文似洪忠文若夔王正肅遂李文清宗勉
杜清獻範徐忠簡清叟袁正肅甫李觀文韶也

時號小元祐遺

逸如劉漫塘趙章泉皆見旌異入洛師潰乞罷不可拜左丞相
丐去益力投觀文殿大學士提舉洞霄宮封申國公賜御書輔
德明謨之閣淳祐四年拜少保兼侍讀五年拜少傅進少師奉
國軍節度使賜第于西湖之漁莊進讀仁皇訓典謂仁祖之仁
厚發爲英明孝宗之英明本于仁厚二者相須此仁祖孝宗之
所以爲盛也六年拜太保七年拜太傅右丞相先生方放浪湖
山每寓僧刹帝勉諭有加軍國事仍自先生決之十一年感疾
乞罷政拜太傅保寧軍節度使充醴泉觀使進封齊國公致仕
卒贈尚書令追封魏郡王諡忠定先生不好立異湯仲能巾嘗
論事侵之及再相仲能求去先生曰己欲作君子使誰爲小人
力挽留之徐清叟嘗論列先生乃引之共政先生與彌遠議立

理宗駭駭至宰輔然端平之閒召用正人先生之力也

參史傳

參政應葺芷先生儼

附弟係

應儼字之道昌國人刻志于學嘗從樓迂齋遊文聲日振嘉定十六年試南省第一遂舉進士爲臨江軍教授廼遷祕書郎請早建太子入對帝問星變先生請修實德以答天戒帝問藏書請訪先儒解經注史因及程迥張根書皆有益世教帝善之淳祐初遷宗正寺丞端平開邊兵敗先生預議邊事坐斥後復用以起居舍人權兵吏二部侍郎兼直學士院掌內制理宗一夕召之草麻夜四鼓五制皆就帝奇其才翌日拜翰林學士八年授同知樞密院事九年拜參知政事封臨海郡侯以疾乞歸卒于家弟係字自得六歲能詩紹定四年進士調烏程尉議毀淫

祠獨存徐孺子廟鄰邑有沈氏兄弟訟財郡檄自得案實自得委曲開諭適沈子魁鄉薦因賦詩傲之兄弟感悟爭遂息仕至

文林郎

參史傳寧波府志

謝山翁洲書院記曰應參政葺芒山昌國遷鄞其貴也建翁洲書院于故居以興起後進穆陵賜御書以榜之元時以昌國爲州書院置山長參政之孫全軒領之因祀葺芒于中而以其子蘭坡附焉其後又增祀全軒詳見應奎翁碑記中明時以倭難廢昌國隸定海書院亦圯今昌國復置縣改定海曰鎮海而以昌國稱定海于是復立翁洲書院奎翁曰翁洲爲海外諸番所觀聽使爲彼之徒推其尊禮仙佛之念而知尊孔子之道廓其求聞清淨寂滅之念

而返諸六籍之學則其有補于聖教者固非淺也奎翁之言至矣子更何以益之但考穆陵之時甬東書院實與翁洲並置甬東出于安晚其與葺芷皆迂齋之徒也故二公並以文章名

忠簡家學

簽樞王潛齋先生塾

別見西山真氏學案

朝奉家學

文憲王魯齋先生柏

別見北山四先生學案

羊氏家學

羊先生哲

羊哲永德子師呂成公之子伯愚問學該博才思深遠著指南

集 參括蒼彙紀

時氏家學

書記時所性先生少章

時少章字天彝號所性金華人父朝散郎瀾師事呂東萊先生
天才絕出博極羣書談經多出新意而于史學尤精詩由盛曆
而追漢魏文泝宋東都以前而逮古作者吳師道稱其峻潔精
工豈惟雄視吾邦蓋一代之偉人也由鄉貢入太學年踰五十
登寶祐進士由麗水主簿歷諸教授山長用薦擢史館檢閱有
忌者改授保寧節度掌書記所著有易詩書論孟大義六十卷
雜詩文數千篇總名所性集 參金華先民傳

王氏門人

鄭先生聞 別見北溪學案

王氏家學 林汪四傳

尚書王厚齋先生應麟 別爲深寧學案

常博王默齋先生應鳳 別見深寧學案

鄭氏門人

忠敏趙先生范

忠靖趙庸齋先生葵 並見滄州諸儒學案

戚氏家學

隱君戚貞孝先生紹

戚紹婺州人知袁州如琥之孫也入元隱居不仕同志之士相

與號爲貞孝先生 參黃文獻集

教諭戚先生象祖

附師王元章

戚象祖字性傳貞孝先生之子少服家庭之訓弱冠師事王元章益達于命義年幾五十乃用舉者得東陽縣學教諭遷紹興之和靖書院山長年未七十輒求致仕弗許復用爲信之道一書院山長訖辭不受僑居永康之太平

同上

戚朝陽先生崇僧

別見北山四先生學案

汪氏家學

汪先生開之

別見北山四先生學案

宋元學案卷七十三終